



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 3

WWB Championships: Nitu Ghanghas semifinal-i iogo

Article 370 mebenok tashi election nung metokteptsü: Mehbooba Mufti



VOL. XX NO. 160 (ADOK 160) DIMAPUR YANGTEPNÜ (THURSDAY)

METSÜREMI (MARCH) 23, 2023

₹ 5.00

## Naga yimten tebilemstsü, ENPO takhangba aser census maparen atema Opposition maliba sorkar nungdaker

**Kohima, March 22, 2022 (TYO):** Naga yimten tebilemstsü, ENPO takhangba aser delimitation atema census maparen timi inyaktüsü atema opposition maliba sorkar ka alitsü nungdaker, ta Nagaland Chief Minister Neiphiu Rio-i ashi.

Nationalist Democratic Progressive Party (NDPP) Kohima Region-i Kohima district nungi MLA asem nem tenüngsang agütsüba sentong nung jembidang Rio-i iba ya ashi.

Kohima district nungi MLA asemji- CM Rio, School Education & SCERT Advisor Kekhrielhoulie Yhome aser mezüngbuba Naga tsür Cabinet Minister for Women Resource Development and Horticulture, Salhouuonuo Kruse nung lir.

Election magidang loktepa NDPP-BJP ajanga menden teimba nung takok angu aser angu aser tanga political party tem den Independent MLA temia sorkar nungitba metetdaksüogo, ta Rio-i ashi.

"MLA 60 prong külemi longjemmer inyaktüsü ta angateta



Nationalist Democratic Progressive Party (NDPP) Kohima Region-i March 22, 2023 nü Kohima district nungi MLA asem nem tenüngsang agütsüba sentong ka agidang tangokba noksa angur.

parnok ajaki züluba 'letter of support' agizükogo. Naga nungeri Naga yimten latetsü atema külemi inyaktüsü nungdaker saka nisung ajaki külemi makok nunga MLA temi iba mapa inyaktüsü atema longjemmer" ta pai metetdaksü.

ENPO-i state balaka meshiba atema Rio-isa "sorkari parnok asoshi tebilemstsü abener aser züngsem MLA prongi parnok

ajungtsü atema inyaktüsü" ta ashi. "Sorkari Census maparen inyaktüsü aser tesüiba nung ama masü nendaka inyaktüsü. Tesüiba nungbo district kar nung küm 10 tsünda nütsüng 90% tema akümba bushiteta liasü saka tangbo delimitation maparen takok angutsü atema jungjunga inyaktüsü" ta CM Rio-isa ashi.

"NDPP-BJP teloktep sorkari tanga political party tem teyari

agütsü atema inyaktüsü" ta ashi. "Sorkari Census maparen inyaktüsü aser tesüiba nung ama masü nendaka inyaktüsü. Tesüiba nungbo district kar nung küm 10 tsünda nütsüng 90% tema akümba bushiteta liasü saka tangbo delimitation maparen takok angutsü atema jungjunga inyaktüsü" ta CM Rio-isa ashi.

agütsü atema inyaktüsü" ta ashi. "Sorkari Census maparen inyaktüsü aser tesüiba nung ama masü nendaka inyaktüsü. Tesüiba nungbo district kar nung küm 10 tsünda nütsüng 90% tema akümba bushiteta liasü saka tangbo delimitation maparen takok angutsü atema jungjunga inyaktüsü" ta CM Rio-isa ashi.

"NDPP-BJP teloktep sorkari tanga political party tem teyari

president Dr Shurhozellie-i Naga nunger atema inyakba regional party ji NPF dang lir ta ashiba atema "2003 elections matongdang ni dena NPF asentenshia liasü, iba mapang Assembly nung NPF MLA ka danga maliasü aser Election Commission-i de-recognised liasü" ta Rio-i metetdaksü.

"2003 küm NPF-i BJP den yaritepa sorkar aküm aser tanga parnok Manipur sorkar den yariteper. NPF ya dang Naga peoples party ta shingai meshitetsü kechiyong NDPP ya tashitait regional party ka lir" ta pai ashi.

Ruling party ka ama lennirtemi sorkar dang election nung nangzükbatem nenshitsuila. NDPP-i sorkar dang election manifesto mapa küma inyaktüsü aser aibelentem metongshitsü atema rongshitsuila, ta Rio-isa ashi.

"2018 nung NDPP MLA 18 (45%) dang aliba nungi taküm 25 (62.5%) kümdaksüba atema NDPP lennirtem aser züngsemtem dang pelar" ta paisa ashi.

## Kohima Police-i G20 summit atema metetdaksür

**Dimapur, March 23, 2023 (TYO):** April 5, 2023 nü Kohima nung G20 Summit alitsü atema Bodbarnü RTA senden ka menogo.

March 27, 2023 matongdang gari lenmang nung garitem anena ayuba, ki yangludang amshiba osettem bendena ayuba aser dokan/shishilembadak nija temi 'no parking signages' yua aliba

agientsü osang sangoktsütsü atema tanü senden nung lemet.

Kohima Police appeals for co-operation and support from all citizens.

Tashi mangartem indang osettsüset sota ayutsü aser garitematsür aotsü saka iba senji gari kiburtemi menoktsü, ta PRO, Kohima Police-i sangdong ka nung metetdaksü.

## Taoba Minister Y. M. Yollow Konyak mang ayimer

**Dimapur, March 23, 2023 (TYO):** Taoba Minister aser MLA Y. M. Yollow Konyak tanü ajungbena New Delhi nung asüba osang angashia temulung raksar ta CM Neiphiu Rio-i sangdong ka nung ashi.

Yollow Konyak ya lennir tajung ka liasü aser pai lanuwa nungi politics kanga jangra. Pai lokti balala nung tenzüka aru aser talisa Wakching area aser Konyak nunger ajungkettsü atema inyak. Pai politics nung ajemoktsü atema sorkar mapa nungi anojungi sodi agia liasü, ta CM Rio-i ashi.

Pa ya kanga dang tenendak, meranga inyakba aser o tanük agi jembiba public lennir ka liasü. Pai nübertem asoshi kanga bilemstsü aser pa iba lima nungi pilaa aoba ya Nagaland atema aser talisa Konyak kin atema takoksa tulu lir, ta pai metetdaksü.

"Ni Nagaland sorkar tenüing aser ozü kibong tenüing nung asüri toktsür aoba kinungertem den asükhu lemsateper. Tulusang Tsüngremi nenok nem tashi aser

tesünep agüjang ta sarasademtsür" ta CM Neiphiu Rio-isa ashi.

Nagaland Governor La. Ganesan-ia taoba Minister Y.M. Yollow Konyak asüba osang angashia aoksaba aser temulung raksaba metetdaksüogo.

Asür Yollow-i Nagaland nung Minister, language translator aser BDO mapatem inyakogo. Pai kaketshir lennir ka aser ano Konyak Union nunga inyakogo. Pa asüba ya state-i bendanga agütsüba public lennir tajung ka akoksaogo, pai Nagaland atema mapa balala inyakba teti bilemteptsü, ta Govonor Ganesan-i sangdong ka nung ashi.

Maneni, IPR and Soil & Water Conservation Advisor Imkong L. Imchen aser Labour, Employment & Skill Development and Excise Advisor Moatoshi Longkumer nati sangdong balala nung taoba MLA Yollow Konyak asüba atema mangyimba osang metetdaksüogo.

## Central Team kati State Food Laboratory semdang

**Dimapur, March 23, 2023 (TYO):** March 22, 2023 nü Commissioner Secretary H&FW cum Commissioner Food Safety, Y Kikheto Sema IAS-i National Institute of Health & Family Welfare (NIHFW), GoI teshimtet telok ka den ajuruteper.

FSSAI notified State Public Health Laboratory (State Food Laboratory) nung Kikheto-i Prof VK Tiwari lenisüba kübok aruba telok den senden amen.

Iba telok nung Prof VK Tiwari, Dean, Dr. Ravinder Kumar, CMO aser Dr. Ramesh Gandotra, ARO nunger dena lir aser parnoki "Rapid Appraisal of Strengthening of Food Testing system including provision of

Mobile Testing Labs (SOFTTEL)" atema SPHL semdang.

Iba mapa ya Food division, Ministry of Health and Family Welfare, GoI den yaritepa inyakar.

FSSAI, GoI-i Food Laboratory ajungkettsü atema nungdakba teyari ajak agüja NABL accreditation ngudaksüba atema pelar, ta Commissioner of Food Safety Kikheto-i ashi.

"Northeast nung NABL accreditation anguba food laboratories kar dang aliba nung Nagaland dena lir aser tang infrastructure development o logistics installations renemba sülen iba Laboratory kanga tajung akümtsü aser kidanger state tem

yaritetsü" ta paisa ashi.

Tuensang District nung Food Testing facility ka nungdaker aser iba ajanga district 8- Mon, Longleng, Tuensang, Noklak, Shamator, Kiphire, Zunheboto aser Mokockhung atema inyaktsü, ta Kikheto-isa FSSAI, GoI teshimtet telok dang metetdaksü.

Nagaland nung tang Food Safety On Wheels (FSW) ka lir aser India sorkari agütsüba Modified Food Safety on Wheels (MFSW) ana kobi meli senzütsü. Ajisüaka district headquarters ka nungi ka senzütsüba ya kanga tasak lir aser mapang agir anungji Centre sorkari ano MFSW 4 talila agütsütsü mepishir, paisa ashi.

## Ki aser ali nung tax 'omitted' anungji 'deleted' asütsü kecha mali: CM Rio

**Kohima, March 22, 2023 (TYO):** "Nagaland Municipal Act (NMA), 2001 yanglushiogo aser ali aser ki nung tax meyipa repringshitsü ahangba ama inyakogo, kechiyong iba arrla 'omitted' lir anungji 'deleted' asütsü kecha mali" ta Chief Minister Neiphiu Rio-i ashi.

Nagaland state assembly-i 2001 küm Constitution indang 74th Amendment mapa tenzütsü atema agizük aser Municipal Elections agia liasü. 74th Constitution Amendment Act ajanga jenjang balala nung Urban Local Bodies (ULB) indang tashi aser ketdangsubaren decentralization asütsü shia lir, ta CM Rio-i ashi.

2016 nunga ULBs nung 33% women reservation dendaktsütsü atema yanglushiogo aser 2017 nung elections agitsü liasü saka sorkar o public tsünda mepetmesü adokba ajanga nisung

3 taküm sama aser Old Secretariat complex rongdoktsü, ta paisa metetdaksü.

"Ajisüaka, tang yabo Supreme Court indang tetuyuba lir. SC-i March 9 tashi nung ULBs election agitsü sangdong agüjang ta metetdaksü aser yamaji inyakogo. March 14 nü SC-i iba maparen nung tetsükdaktsü magütsütsü shiogo" ta CM Rio-isa ashi.

"March 9, 2022 nü state sorkari kin hohotem aser civil societies den senden ka amen aser idangji elections agitsü bangzüng ka renem. Iba senden nung Ao Senden-i Act nung ali aser ki nung tax indang yanglushitsü ashi aser ibaji Constitution indang Arrla 371A den putepa 'omit' süogo" ta paisa metetdaksü.

Tan Assembly session nung ULB election indang benoka jembitsüba liasü saka iba ken o okadaki subjudice asünung MLA

60 prongi Mongulbarnü Assembly tembangba sülen ang jembitep, ta Rio-isa shisem.

"MLA ajak dang pei pei kin hohotem den ajurutepa iba onük lemsateptsü aser ajak longjemmer ULB elections agitsü mesüra magitsü lemettsü shiogo. Asenok ajak ka dang asütsüba aser asenoki election maginüra tangatetba shitak nung külemi noktaksüla" ta CM Rio-isa ashi.

Public-i sorkari akümtsü shimtet anungji sorkari nübertem taginüba anema meinyaktetsü kechiyong law & order timtem madokdaksünür, ta paisa ashi.

Dimapur, Kohima aser Mokockhung municipal bodies-i 'omitted' melena 'deleted' amshitsü asügangdanga agizüktsü asü koda ta osangbeneri asügangdang "iba ya yanglushiogo aser omitted süogo anungji deleted asütsü kecha mali" ta Rio-i langzü.

# Peren district nung Yuva Utsav benjong amung



Xavierite Auditorium, St. Xavier College, Jalukie nung March 22, 2023 nü Yuva Utsav benjongmung mapang Nagaland Governor La. Ganesan-i E-Rickshaw (Women Empowerment Initiative) sayatsüba noksa nung angur.

**Dimapur, Metsüremi/March 22 (TYO):** Ministry of Youth Affairs & Sports ajanga sponsor süa St. Xavier College, Jalukie aser Nehru Yuva Kendra Sangathan lungjemer March 22, 2023 nü Xavierite Auditorium nung District Level Yuva Utsav ayongzüka munga liasü. Iba sentong ya "Remove Any Trace of Colonial Mindset" omen nung ajemdaker amung.

Iba benjongmung nung tongti tesemdang ka ama jembidang Nagaland Governor, La. Ganesan-i, iba college nungi University Toppers, India tir nungi NSS National Award angurtem, NCC National Campers aser Nagaland Olympic 2022 nung medal angurtem lir ta angazüka temolung sangwa pelar, ta ashi.

Cricket, Archery, Football aser Athletics amala state team nunga iba college nungi kaketshir jenti shilem agir ta angazüka kanga pelar aser itemji ajanga college ya

academic tsütsü kisüing masü saka co-curricular activities nunga junga anitetba ajiteter, ta pai ashi.

Küm ishika iba college nung kaketshir tetsürtem ya teburtem dang nungi timba lir aser iba ya college asoshi temaitsü tajung ka lir, ibai tetsür temeden aser ibai linük yangerbaji lir, ta pai ashi.

Asen linük nung nüburtem temaba jenjangi ajungkettsü asoshi asenoki mezüngbuba nung tetsür nem tashi agütsütsüla, ta La. Ganesan-i ashi.

Linük nung model citizen ka ama asenoki takum aliba yimya koba sor tain kumer kibong kumer tanur sor asüba lir, yangji dang metembangtsüla. Shisaliok ajanga pei asoshi, kibong asoshi, asen state asoshi aser asen linük asoshi teinyaktsü angatetdaksür, ta Nagaland Governor-i ashi.

Pai kaketshir dang tangar ajungmesoba nisung ka-ka akumtsü aser linük yangerba nung yaritsü ajungshia liasü.

Tetsür kaketshir temi anepalutsü aser Women Cell ajanga ketdang asütsü asoshi tetsürtem atema college nung E-Rickshaw sayaba atema pai pelaba lemsatepa liasü.

Iba sentong yagi lanurtem aser talisa tetsürtem molungjang nung meranga inyaktsü ajungmesotsü aser khuret abentsü imlar, ta pai ashi.

Iba sentong nung tetushi tesemdang Bishop of Nagaland, Most Rev. Dr. James Thoppil liasü aser paia kaketshir ajungshia liasü.

Sentong nung Principal, Dr. Fr. Francis Cheerangal-i salem o ashi aser Nodal Officer NYKS, Ruokuovikho Chale-i Yuva Utsav indang rateta ashi aser Xavierite Youth Care Coordinator, Mahieyile-i melepzung o jembia liasü.

Iba sentong nung Young Writers' & Artists' Contest, Declamation, Photography & Cultural Dance amala nung tetoktepba agia liasü.

# NCC Group Commander-i Yingli College semdang



**Dimapur, Metsüremi/March 22 (TYO):** Group Commander, Kohima NCC Group, Brig PS Sangwan-i March 22, 2023 nü Yingli College, Longleng semdanga liasü.

Pa meina Col CST Swamy, Commanding Officer, 25 Naga Bn NCC, Mokokchung oa liasü.

Ibai NCC units tem küm shia semdanga jajaba nung shilem ka liasü. Parnok ya Senior Under Officer Shetlong P-i agizüka liasü.

Group Commander Brig PS Sangwan ya Dr T Tamsu Imti, Principal, Yingli College ajanga pelashishia agizük aser iba mapang college-i kaketshir ajangzüksü sentong balala agiba indang rateta ashi. Tesüiba küm ishika tsüingta 25 Naga Bn NCC kübok tajungtiba college tem

rongnung Yingli College ya ka lir.

Iba sülen Brig Sangwan-i NCC cadets tem den jembia aser NCC inyakyim ajak nung parnoki bendanga agütsür meranga inyakba atema tenüngsang agüja liasü.

Pai cadets tem dang parnoki tarutsü nung inyaknubatem bilemdangtsü aser zülutsü ashi.

Naga nunger kaketshirtem sempet tajung lir aser English oshi kanga junga jembiteter, anungji Central Government mapa angutsü maongka tajung lir, aser Scheduled Tribe atema vacancy aika wazüka yuja lir, ta pai ashi.

NCC 'C' Certificate anguba ya UPSC aser NPSC tatidang nung tokteptsü asoshi dang dang nungi kanga agi tajungba lir, anungji item tatidang

ajangtetsü merangtsüla, ta ashi.

Ano Reliance aser SpiceJet ama company tulu temi NCC cadets tem shimba indanga pai lemsatep aser NCC Group Kohima ajanga Nagaland nungi cadets tem item amala company nung shimoktsü nükjidong nung item company tem jaoktsü merangtsü, ta pai metetdaksü.

Iba sentong nung Dr T Tamsu Imti-i jembidang college indang puti otsü bener arua ashi aser NAC ajanga college nem 'B+' rank agüja lir aser Nagaland nung tasembuba jenjang nung lir, ta ashi.

Pai cadets tem dang Academics aser NCC nung temolung agütsütsü ayongzük aser mapang angutsü asoshi itemji kanga tongtipang ta ashi.

Group Commander-i college semdanga cadets tem ajungmesoba atema pai pelaba lemsatepa liasü.

NCC inyaksangshi ulushitsü atema Brig Sangwan-i college management den sensaksema liasü. Pai college library semdang aser 'Digital Library' amenokba den kaket jenti benden ayuba atema pai tenüngsang agütsü.

Sentong nung Cadet Moilongmanchu-i melepzung o jembia aser NCC ket tena sentong tembang.

**Governor-i Tseminyu semdangtsü aliba atema senden amen Dimapur, Metsüremi/March 22 (TYO):** Nagaland Governor La Ganesan-i March 28, 2023 nü Tseminyu district aser Chunlikha yimtsüng semdangtsü aliba dak sendakba nung shisadokden senden ka Deputy Commissioner, Tseminyu indang Conference Hall nung March 22, 2023 nü mena liasü.

Iba senden nung March 24 aser 25, 2023 anogotem social work alitsü pangjem. Iba senden nung Heads of Offices, NGOs aser nübur lenirtem dena liasü. Senden nung Deputy Commissioner, Tseminyu, Dr. Zasekuolie Chusi IAS menden liasü.

**Longleng nung Poshan Pakhwada 2023 semzükogo Dimapur, Metsüremi/March 22 (TYO):** Department of Social Welfare, Longleng ajanga March 21, 2023 nü CDPO Office, Longleng nung 'Millet for Nutritional well being Celebration of Swath BalakSpardha and Saksham Anganwadis' omen nung ajemdaker Poshan Pakhwada 2023 sentong semzüka liasü.

Iba sentong nung S. Amos Khing, Supervisor menden liasü aser L. Shamdok Menlei Phom, Supervisor ajanga tarur pela agizükba o jembia.

CDPO Longleng, Atsole Khalo ajanga Poshan Pakhwada semzüksü aser Poshan pledge agia liasü.

Iba sentong nung Poshan Abhiyaan indang District Coordinator, Longhong Phom-i Poshan Pakhwada 2023 teratet ashi.

Iba sentong nung Anganwadi Workers aser Helpers tem aser Longleng district kübok convergence departments tem nungi ketdangtsürtem dena liasü.



Dimapur Government College, Dimapur indang Jal Shakti Team ajanga March 22, 2023 nü "Catch the rain where it falls, when it falls" omen kübok World Water Day 2023 anogomung munga liasü. Omen nung ajemdaker awareness agüja sentong tatsüka agiba sülen Morung Express nungi college campus tashi tetsüng agi jaja aser yangji ano sentong ka agia anogomung tembanga liasü.

# BS&G Kohima district tir inyaktsü Shanavas C shimogo

**Dimapur, Metsüremi/March 22 (TYO):** Nagaland Bharat Scouts and Guides, Kohima District ajanga Bharat Scouts and Guides, district ketdangtsür mapa nung aniokba sentong ka Deputy Commissioner, Kohima indang office nung March 22, 2023 nü ayongzüka agia liasü.

Iba sentong nung Kohima District Bharat Scouts and Guides tir ama jembidang, lokti nung temelenshi bener arutsü atema Scouts & Guides shilem kanga tongtipang lir, ta Shanavas C ajanga ashi.

Pei sasa melenshitsüla aser telungjem asoshi bilemetsüla aser lokti nung shilem agütsüla, ta pai Scouts & Guides tem ajungshia liasü.

Lokti nung temelenshi bener arutsü asoshi khuret tali abentsüla, o tali mejembie mapa ang tali inyaktsüla aser motto "Duty to Call, Duty to Others, Duty to Self" ajanga ashiba ama linük asoshi senso tajung ka-ka akumtsüla, ta Shanavas-i ashi.

Sentong tenzüka Joint State Secretary, Tamsurenla-i jembidang, Bharat Scouts and Guides ya lanurtem asoshi voluntary non-political, educational movement ka lir, aser lanurtem temang shi, tekolok, loktiliba aser tanüla nung takok angutsü asoshi telemsa makai ajak anioker aser parnok ya local, national aser international communities nung züngsem amai lir, ta ashi.

Lai ashiba agi, Scouting ya linük aser litsü-lika 216 nung prokshia lir aser lanur tetsür

aser tebur züngsem million 31 dak tema lir.

District Trainer (Guide) Roshmi Rana ajanga iba sentong nung Kohima District Bharat Scouts & Guides indang osang agütsüdang, Kohima district kübok 2022 census nung Scout Troops tenet, Guide Companies ti, Rover Crew ana aser Ranger Teams ana nung züngsem Scouts 200 aser Guides 255 lir, Rover Scouts 33, Rangers 28, Scout Masters toku, Guide Captain 13, Rover Scout Leaders ana aser Ranger Leaders ana lir, ta ashi.

Bharat Scouts & Guides, Kohima District indang tir tasenba aser Deputy Commissioner, Kohima, Shanavas C atema Reaffirmation ceremony ya State Training Commissioner (Scout), R. Albert Solo-i ketdangtsü agi, Chief Commissioner (BSG) Kohima District ama District Education Officer, Emilo Patton shima tezüngzüktep agiba aser Secretary (BSG) Kohima District, Senior AI Education Officer, Kevizeno Savino indang Reaffirmation ceremony ya State Organizing Commissioner (Guide), Vimezhonu Tetso-i ketdangtsü agia liasü.

Iba sentong nung menden ya District Organising Commissioner (Guide), Petekhriono Tetso liasü aser District Training Commissioner (Scout), Vito Sakhrü ajanga melepzung o jembia.

# PM Modi-i 6G test bed amenoktsüogo



New Delhi nung ITU Area office & Innovation Center semzüksüba sentong nung 'Bharat 6G Vision' document sayatsüba mapang Ato Kilonser Narendra Modi aser International Telecommunication Union Secretary General Doreen Bogdan-Martin aser Union Minister for Communications, Electronics & Information Technology Ashwini nunger tangokba noksa nung angur.

**New Delhi, Metsüremi/ March 22 (Agencies):** Ato Kilonser Narendra Modi-i Bodhbarnü 6G research & development test bed amenoktsüogo aser ashiba agi, iba ya linük nung taruba küm ishika tsüngda amshi tenzüksü. Delhi nung International Telecommunication Union (ITU) Area Office aser Innovation Centre semzüksüba mapang Ato Kilonser-i Bharat 6G Vision Document sayaja liasü, koba 6G mapa küma inyaksangshitsü atema tamendakdak asütsü. "Tanü India digital revolution dak sendakba nung kanga kara tejakdangi odar. India-i alima nung 5G takaratiba benokogo kechiyong 5G service ya anogo 120 tsüngda yimti 125 nung benokogo aser 5G services yagi linük kübok district 350

ayimjemogo," ta Modi-i ashi. Paisa, 5G benokba sülen ita trok dang lir India-i 6G benoktsü atema inyaksangshi tenzükogo, ta ashi. "Tanü sayaba vision document ya taruba küm ishika tsüngda 6G benoktsü atema tamendakdak tongtibang ka asütsü," ta pai ashi. ITU ya information and communication technologies (ICTs) atema United Nations' indang specialised agency lir. ITU Headquarter ya Geneva nung amenoka lir aser iba kübok field offices, regional offices aser area offices balala amenoka lir. India-i 2022 küm March ita ITU den Area Office amenoktsü atema Host Country Agreement ka nung sign süogo. Sorkar sangdong ka ajanga ashiba agi, Bharat 6G vision document ya Technology Innovation Group on 6G (TIG-

6G)-i renem, koba 2021 küm November ita tenteta liasü. Iba telok nung Ministries/ Departments, research and development institutions, academia, standardisation bodies, Telecom Service Providers aser industry tem züngsem ama densema lir aser iba telok yagi India nung 6G amenoktsü atema sentong balala yanglutsü. "6G Test Bed yagi academic institutions, industries, start-ups, MSMEs amala nem ICT technologies renloka aoba tendangtsü asoshi maongka agütsütsü. Bharat 6G Vision Document aser 6G Test Bed yagi innovation, capacity building aser linük nung technology takaraba nung adopt asütsü atema teyari agütsütsü," ta kasa sangdong ajanga metetdaksü.

# Delhi Police-i British High Commission kima barricades agintsü

**New Delhi, Metsüremi/ March 22 (Agencies):** Pro-Khalistan activists temi UK kübok Indian high commission nung linük wako atsüzüksüba sülen anogo ishika lir Bodhbarnü Delhi Police-i linük yimti nung British mission kima barricade tem agintsüogo. Police-i ashiba agi, barricade tem yagi senzusenpongertem nem tetsüdaksü agütsür aser British high commission indang security kanga junga lir. "Idaki British High Commission security kanga junga lir. Ajisaka commission leni aoba lenmang nung barricade yoka aliba ajanga senzusenpongertem

minprongba agintsüogo," ta police office tejen kati PTI dang ashi. UK nung India high commission nung linük wako atsüzüksüba mapang commission nung security peria maliba osang angazüka kanga mepelaba India-i lemsatepba sülen anogo ka lir iba jenjang agiogo. British High Commission otongdar nungi osang agitsü merangba mapang security dak sendakba nung parnoki osang kecha melemsateper ta langzü. Pro-Khalistan activists temi India wako atsüzüksüba noksa aser video social media nung prokshiba sülen Deobarnü

India-i British deputy high commissioner jaoka, Indian high commission nung security maliba indang ashishia liasü. 'Waris Punjab De' lenir Amritpal Singh aser pa pusemertem aputsü atema police-i merangba atema telangzüba agüja separatists temi iba longkak aitba sentong ayongzüka liasü. British nunger ketdangsurtemi ashiba agi, UK sorkari Indian High Commission nung security ken o ya kanga süoki ia agitsü ta shiogo aser separatist Khalistani wako ayipshia longkak aitertemi Indian mission raksatsüba aitsüogo.

# Sisodia-i kaket kar bener aotsü atema temelaba meshi

**New Delhi, Metsüremi/ March 22 (Agencies):** Excise policy 2021-2022 nung inyakyim meshidakba atema ken o bushisüngdanga dak sendakba nung Delhi court kati taoba deputy chief minister Manish Sisodia anogo 14 judicial custody nung ayutsü atema tetuyuba agütsüogo. Senotsü oshi meshi-i amshiba dak sendakba nung Enforcement Directorate (ED)-i pa parnok ket nung yur ken o ashishiba tanü tembangba sülen pa Delhi, Rouse Avenue Court nung special Judge MK Nagpal matsüngdangi anir oa liasü. Sisodia-i court dang pa judicial custody nung yua aliba mapang azüngtsü atema tamangba yimsü dak sendakba nung kaket kar bener aotsü atema temelaba meshia liasü. Court-i Aam Aadmi Party (AAP) lenir dang ya iba dak sendakba nung application ka zülutsü tuyu aser court-i pai mepeshiba temelaba agütsütsü ta ashi. Central Bureau of Investigation (CBI)-i benokba ken dak sendakba nung Sisodia judicial custody nung dang liasü. Delhi Excise Policy 2021-22 yangluba aser benoka inyakba dak sendakba nung

ochi mashi ken o sendaka lir ta shia CBI-i Sisodia February 26 nü pua liasü. Kasa mapang nung pa CBI ken o dak sendakba nung Tihar Jail nung aliba mapang ED-i March 9 nü apu. Mongolbarnü iba special court yagi, CBI-i bushisüngdanga aliba ken o dak sendakba nung bail atema Sisodia-i mepeshiba March 25 nü angadangtsü atema atsülangja liasü. Sisodia-i ashiba agi, pa kecha lendong nung mali aser CBI-ia excise policy dak sendakba nung pa anema kuli kecha nguteta mali. Pa okatsüri ashiba agi, pai sübokrem agizükba kuli tezüluba nung kecha mali aser aija alisangi kulitem raksa intok ta ashiba ya tamendakdak kecha mali. Bail atema mepeshiba anema CBI indang special public prosecutor D P Singh-i ashiba agi, tenük kuli agütsürtem anisatsü aser kulitem raksa intoktsü atema Sisodai dak tashi lir. "Chargesheet benoktsü atema anogo 36 dang anunga lir. Iba mapang metembang tsüngda pa bail nung chiokra iba ajanga bushisüngdang nung tetsükdaksü adoktsü," ta SPP-i ashi.

# Article 370 mebenok tashi election nung metokteptsü: Mehbooba Mufti



**New Delhi, Metsüremi/ March 22 (Agencies):** Taoba Jammu and Kashmir chief minister Mehbooba Mufti-i ashiba agi, Article 370 tanaben mebenok tashi la assembly election nung metokteptsü. PTI den sensaksema mapang People's Democratic Party (PDP) lenir yagi ashiba agi, Indian Constitution kübok Article 370 koba ajanga Jammu and Kashmir nem jenjang balaka agütsür iba ya la atemabo "emotional" ken o ka lir. "Article 370 mebenok tashi ni kodanga assembly elections nung metokteptsü. Assembly nung züngsem ka ama tenangzüktepba agiba mapang teti J&K Constitution aser Constitution of India ta constitution ana aser wako ana dak ajemdaker tenangzüktepba agia liasü," ta Mufti-i PTI dang ashi. "Ni matongba-ang asütsü akok ajisüaka iba ya kü atemabo "emotional" ken o ka lir," ta lai ashi, ajisüaka Lok Sabha

elections nung tokteptsüba indangbo mejangja ta ashi. PDP lenir yagi tawa, BJP pur atema kodang temsüa kümdir iba mapang nung Jammu and Kashmir nung election agitsü ta ashi. Poonch nung lokti senden ka nung shilem agiba sülen osangbenertem den sensaksema mapang Mufti-i iba telangzüba agüja liasü. Assembly election indang asüngdanga mapang lai kecha meshitettsü ta langzü. "Election indang ni kechi shitetsü, kechiyong election agitsüba ya Election Commission-i masü saka BJP-i mulungba mapang ka nung agitsü. Election Commission-i J&K nung election agitsü atema parnok renema lir ta shiogo ajisüaka BJP puri kodang mapang shidak ta bilemdir idangji agitsü," ta lai ashi. Jammu and Kashmir nung political party tem assembly election atema renemshidar aser lokti senden balala ayongzüka agia arudar. Taoba minister aser National Conference tir Farooq Abdullah-i taoba hopta ashiba agi, Chief Election Commissioner (CEC) Rajiv Kumar aser tanga züngsemtemi J&K nung assembly election takaratiba nung agitsü ta tenangzükba agütsüogo.

**GOVERNMENT OF NAGALAND**  
**DIRECTORATE OF SCHOOL EDUCATION**  
**NAGALAND :: KOHIMA**  
**NOTIFICATION**  
*Dated, Kohima the 20th March 2023*  
 NO.ED/PLN/B-1/2020-21:It is hereby notified to all Individuals/Societies/Trusts/Organisations that the application form for Opening of New Private Schools in the State shall be made available in the Directorate of School Education, Kohima from 3rd April 2023 till 31stMay 2023.  
 The forms may be collected from Room No. 421 (Planning Section) during office hours.  
**(THAVASEELAN K) IAS**  
**PRINCIPAL DIRECTOR**



## TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 23, 2022

### Mangatetba oshi !

**M**eghalaya tatar senden nung yakanü Angh Phagu Chauhan-i Hindi agi jembiba anema Voice of the People's Party (VPP) lenir Ardent Miller Basaiawmoit-i anir par telok senden nung maden oadokba kuliji tim dang aser yangji India nung yimten yimsüsür aser asenok Naga nungertema tangazüksü lesson tajung ka lir ta angateter. Atangji, India nung tetsü oshi tetsütibaji Hindi lir, ajisüaka India lima ya alinük kanga tulu aser idenji kin kidong aser nütsüng nübo aser oshi onsara, anungji India nung rongnung Hindi oshi jembir aser angatettertem dang nungibo Hindi mejembitetter aser mangatetter teimba amai lir. Aji oda, India anüdoklen nungi anülulen tashi nung state shia jembiba oshi asadagra Naga nungertemi Hindi mejembir, Manipur nungertema Manipur oshi lir. Kasaji Assam nung Assamese jembir aser West Bengal nungbo Bengali oshi jembir, Meghalaya nung Khasi aser Garo o jembir, Arunchal Pradesh nungbo oshi aker ano Tripura nungbo Bengali aser Kokborok oshi jembir. Kasaji anülulen Punjab nung Punjabi jembir aser Kerala nung, Tamil nung aser Orissa nungertema Hindi mejembir aser Andra Pradesh nungbo Telugu jembir. Anungji, item state nung alirtem asoshi Hindi oshi ya tetsü oshi masü, bendanger oshi amai akümer. Iba ama temeyoktep kin aser oshi aker agi akümba kin aser linük asünungji, tang tashi India nung kechisüdirsiüaka yimten oshiji Hindi dang asütsü ta ozüng küma meyanglutetter, iba jagi English ya India nung shinga oshia masü saka British-India yimli mapang nungi amshia aruba English oshi ya India nung tetsü oshi amai yimten nungdak ajak nung amshitsü temzüng ozüng nung lateta lir. Iba jagi, India tatar senden nunga tatar teimbakati Hindi nung masü saka English oshi agidang shilem agia jembiba angashir. Iba amaji tangatetter ka nung moi, India nung Hindi jembirtemi kechisüdirsiüaka yimten oshiji Hindi oshi akümtsü ta ozünga amshitsü kangshi nungbo, iba jagi Pakistan nungi pilaa East Pakistan agi Bangladesh küma aoba amato India nunga Hindi mejembiba state-tem yabo India telongjem nungi medeni yimten balala razüka aotsü ana nung dang lir. Atangji, English jembiba agi English nung makümer, yamaji Hindi jembiba agidang India nung akümtsü ta masü. Ajisüaka, oshi ya meimchir loktiliba nung nisung o nisung na angatetteptsü asoshi lir, anungji kechi oshi jembidir jembiba tejbir o tangar na tsüngda angatettepra ojang, iba jagi Tsüngremi agütsüba oshi nukjidongjibo atalokdaksür. Ajisüaka, kidang aser kima yimdong nunga masü saka tatar senden ka nung tatartemi mangatetba oshi ka agi pei state dak aketba yimten ken o governor-i jembira, aji kechi tajanzük ali. Ibaji tejbir asoshia amajok aser tangartem asoshia mezügmeshiba mapa ka dang asütsü. Iba tangatetba nung tatar senden nung Hindi aser English dang masü saka tatartemi jembiba aser angatetba oshi agi jembitsü temzüng ozüngi melaa lir. Iba jagi taoba Nagaland tatar senden nunga tatartem rongnung kati Hindi agi jembiba ajanga senden nung mulung mechitep adokba osanga asenoki angashiogo. Aji oda, Meghalaya nung dang masü saka Nagaland tatar senden nunga tatartem rongnung Hindi mangatetter aika alitsü südi ta bilemer. Iba ama India nung loktiliba tia aser sobaliba jenjang meteta yimten nung lenirtemi kati ka akümtsüba beshira, India telongjemji topur tajungba akümtsü. Atangji, English mejembitetba nisung governor shimbaji tai ta masü, kechiyong India nung yimsüsür ka akümtsü asoshibo tazüng temetetba jenjangbo kecha mezüngshir. Ajisüaka, senden nung o jembiri loktii mangatetba oshi agi jembitsüba kecha nungdak madoker, anungji Hindi mangatetter alidak Hindi agi jembidi süra o meyiper alitsüla. Aji ta mesüra kechi angatettsü aser angatetra kechi jembitsü ? Iba tangatetbaji tang Meghalaya tatar senden nung VPP leniri linük nung yimten yimsüsür, ozüng yanglur aser asenok ajak nem agütsüogo. Joko, yangji angatetter, tang nungibo Phagu Chauhan-i dang masü asenok ajaki tangartemi angatetba oshi nung dang yimten ken o jembitsü merangdi aser mejembitetra meyipdaksütsü mamali.

## OLEMSABANG

### NÜJA MEYONG SORKAR MASÜ NÜBUR MEYONG SORKAR ASÜTSÜLA

~ L. Kika Pongener.

Anogo ishika suiogo, nüburtemi meyonngem agüja shimtetba tatartem rongnungi NDPP & BJP Party lokteper 'People's Democradic Alliance' (PDA)...ta tenung jateter sorkar tasen ka yanglur anir aotsü odagi. Ashiko, küm pongu arishia bener aotsü asü (?) Mesura küm-5 term mabensadang raksatsü... ta nüburtem ajak mulungjang nung tsüremseta bilemer. Tanü putu nung linuk ajunga nung Political Party temeja kati sorkar abentsüsa masü, Party aika lokteper akümba sorkar kati dang yimsü asütsüsa tensa mapangi bentsür arur. Aji oda, shirnok nüburi temulong süa shimtetogo, parnok ajaki pei lima aser nübur meima ochi tangatetba nung marakzüi nokdaker yimsü asütsü nukjidong ayutsüla. Yimsüsürtemi aji kanga junga angatetra temeja Party kati danga yimsü süang, mesura temeyoktep Party kati yimsü süang aji kecha balaka masütsü. Anungji yimsüsür kaji kobala Party nungi sudir süang, pei nüja ajungtsü arishia masü, saka nübur aser linuk meima yimsü asütsü tangatetba alitsüla.

Tang sorkar tasenba nung nübur ajungai kangasa pelaseta bilembaji, 'Opposition' tashi tait alitsüsa, Party aika nungi abensa-a adokba ya asütsü. Taoba sorkar nung nüburtem temulong masüba kaji opposition maliba agi, aibelendang metongshitsür mali, meshitaka ta metetsümonga inyakyongjia nunga ta anema nokdaker aser ola adoker maliba agi asen lima aser nüburtem lenmang aisu nung takoksa ajuruogo. Aji oda, 'Popular Govt' ka jagi opposition tashi-tait liaka, lenmang aisu nung aibelena inyakernung, opposition tashi-tait ka melira, kodaser ochishia shitak inyaksü (?)...ta nüburtemi tsüremseta bilemer. Aji oda, Party aika nungi tatartem abensa-a adokba ngur nüburtem teyongyaba tulutibaji, sorkar tasenba nungbo 'Opposition' tashi-tait alitsü...ta yongyasetta alinung, Party ajaki 'Opposition-less Govt.' ka yanglutsü mulunga lir ta sangdongba angashia, nübur ajungai "Naga nung Politician-tem yabo kecha tangatetba maliba Politician-tem dang asü ... ta kanga sungmanger...!!!??? Atangji, Naga nung Politician-tem yabo pei lima/pei nübur meimer kata mali, oda pei nüja ajungtsü bilemba/bushiba Politician-tem danga ta sasa-a bilemer. Ano Party worker-tema Rulling Party nung dang dennuba Party worker-tem danga ta sasa-a bilemer. Atangji, opposition maliba sorkar ka dangji pei lima aser pei nübur memeimba sorkar ka...ta ajatsü langa lir.

Tanü Naga nung nübur ajunga taginubaji, tashi-tait 'Opposition' aliba sorkar ka aginur. Kechiyong opposition nung ameneri meshitaki inyakbatem tasü-ita tai apotsü aser metongshitsütsü. Rulling nung amener tatartem-ia Minister menden ata-aka, mata-aka, mesura portfolio tajung ata-aka, mata-aka, kechi shilem lemsükdir aji agi temulong asütsüla. Rulling sorkar nung den-aka shirnok minister menden matai lir, parnok-ia tenuk masüng/mulung masüba meli-i alima aser nübur meima küm ponguji abensa-a, arema sorkar meraksatsü bilema litetra asen lima kodaser majungtsü. Joko Naga nung senso nübur ajak tenarong agi mangashinuba ola kaji, Minister/MLA-tem tanü party ka nung denli, asüng tanga party kati oli ...ta teret majang senzüba ajanga sorkar raksajen raksaba agi alima telungi ludaktsüba ya nübur ajaki maginur. Election khen agidang sen crore aikasa endoker, ajiser, nutsüng nübur tsüngda, yimtsür yimer tsüngda, adianu o adianu tsüngda nungsen agitepa, tsükchitep dentepa, azü tokshia oda nisunga tepseta Election ya agir. Aji oda, Election khen agitsüba ya mapa temela masü, alima terenlok mapa nung agitsüba sen crore aikasa endoker aser meshitetba timtem aika lir. Anungji tatar shirnok shimtetdir parnok jagi pei jurila jenjang ajungtsü mebilemi alima aser nübur meima, sorkar küm pongu mabensadang raksatsüba tatar shinga-ia mebilemtsüla. Ano asenok nüburtema sowar amai ola madoki malitsüla, saka sorkar anema asüyongjia meshitakba nungbo yabo meshitaka ta tasü-ita 'Social Media' sabang balala nungi ola adoktsüla. Tangar lima nungbo yimsüsürtemi nübur aser alima memeimi ochi mashi tim masü inyakra, nübur ajungai ola adoka parnok anema apusor, talisa lanurtemi tasü-ita sokar aser yimsüsür anema ola adoker, ibajagi yimsüsürtemi nübur akümtsüba yimsü asür. Ajisüaka, kanga tesusatsüka, asen lima nungbo oda metetsümonga ochimashi mapa inyakba ngua-ka, shingaia ola kata madoker. Aji oda, sen aser supokrem agi terbang nembanga toktsür asü (?) Mesura tsübuba agi ola madoker'ar angateter. Democracy yayim agi yimsü asüba linuk ka nung sorkar ka tashiji nübur ket nung tuluba lir ta senso ajaki angatettsüla. Greek nung nungtuko Scholar Aristotle-i ashi, Democracy means, "Government of the people, By the people, and for the people ". Aji oda, Democracy yayim yimsüsübaji "Nübur meyonng sorkar, nüburtemi shimtetba sorkar, aser nübur atema aliba sorkar lir". Anungji sorkar ya yimsüsürtem meyonng ama yimsüsürtem-ia mebilemtsüla aser nubrtem-ia sorkarji arok meyonng amai bilema tim masüba nungbo tasü-ita ola adoktsüla. Aji oda, Sorkar katashi-ita nokdak-a alitsüba nungji senso nübur ajunga shilem lir ta angatetdi.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Impur nung Palliative Care angatetyim sentong agi



**Dimapur, Metsüremi/March 22 (TYO):** Ao Baptist Arogo Mungdang (ABAM)-i ayonga Impur Christian Hospital Palliative Care nüburtem asoshi Sensitization cum Workshop sentong ka March 22, 2023 nü Impur nung kanga takok ngua agiogo.

Iba sentong nung ABAM nung aliba arogo tenet (7) nungi toklanga tenzükertem aser ICH nung tenzükertem ajak agi 37 dena liasü.

Iba sentong nung shisa len sayur Dr. Obangjungla ajanga Palliative Care ya arogo aser lokti ajak asoshi kanga tongtipang khuret ka kümogo kechiaser tesem ajak nung koda masüba shirangertem agi sünga tokogo, ta shia liasü.

ICH ajanga Palliative Care lapokba ya ajak asoshi tajangzük akaba aser lenmang sayuba mapa ka, ta laisa shisem. Tongtipangsa lai ashiba kaji, arogo asoshi ibai

tanülar mapa inyaksü lenmang tesatem ka lir. Anungji, parnok dak tamajungbai matongdang arogoi parnok taküm nung Tsüngremer sentong angatetdaksütsü kanga tenüngdaksü, ta ashi.

ICH ajanga iba Palliative Care mapa inyaka aodang aika arua tajangzük anguba mapa ka südakjangma ta sarasadema atar, ta Rev. Dr. Mar Pongener, Executive Secretary, ABAM ajanga sangdong ka nung ashi.



Pennsylvania State nungi melangteper arishi küm 22 tain Aaron Brooks-i Honibarnü NCAA title akoba sülen pai Khrista dak tamang akaba indang lemsatep aser Tsüngrem nem tenüngsang agüja liasü. Ajisüaka pai iba mapang, 'tiazü sayutsüngir masü, Muhammad masü mesüra shingai masü saka Yisu Khrista-i iba maongka agütsü,' ta ashiba ajanga Muslim nungertemi mepelar.

# ANOGO ABEN TSÜNGREM DEN

## Aonung Ka T.Ken 74:12-23

"Aji saka akhi nungi Tsüngrem kü chuba lir, ali rongnung Pai tekümzük inyaker" (t.12). Babylon nunger Yirusalem yimti aser tekülemdak repranger Asaphi ibai zülu. Tekong 1-11 nung tarak aser azüngmeyaka aliba pai reprang. Pai Tsüngrem ki tsükchirtemi raksatsüba angu. Babylon nungeri Tsüngremer nisan endoker, parnok meyong nisan asongba angu. Yirusalem tobur tajung aser tamaren ajak mokozü aküm. Kodang nai tsükchirtem raksatsüba aser parnoki awabangba na meketa ngudir, "Akhi nungi Tsüngrem chuba aser pai tekümtet mapa inyaker ta bilemtettang" (t.12).

Tekong 12 nung Asaphi meketa reprangba anener anünglen reprang. Tsüngrem chuba menden nung lir ta pai bilemtet. Mapa kar nung asenoki ayimtener, "Kobika, O Kibuba? Kobika? Kechiba item mapatem ataloker? Kechiba nai kecha meinyaker?" Kechiba Pai Babylon nunger dang Yirusalem aser tenla ki raksatsütsü Tsüngremi mela asenoki metet:

Tanela nung lenirtemi kin mashileni ani, süngyanglu külem aser Tsüngrem sensamasatsü, anungji Tsüngremi parnok azüok. Asaphi anünglen reprang aser ashi, "Tsüngrem Chuba lir. Pai kodanga tamakok maludaksür, aser Pai tekümtet inyaker. Tsükchiri teraksa map inyaksü akok, saka kü Tsüngrem chuba lir, aser alima nung Pai tekümtet inyaker."

Tasembuba, Asaphi tajungshibaji, tesüiba nung Tsüngremi kechi inyak bilemtet (t.13-23). Tsüngremi Temerem Tzüyim lemdang. Pa nübur amaker, tsükchirtem jenshidaksür. Pai arem ajanga nüburtem ani. Pai lung nungi tzü adokdaksü. Pai ayongtem kongdaksü. Tekong 16 nung ashir, "Anogoji ne meyong, aonungjia ne meyong." Asenoki anogoji aginer saka aonung maginer. Tsüngremi anogo aser aonungji azüoker ta bilemtettang. Asaphi pa meketa aliba ajak raksar angudang pa aonung ka ajanga ao. Pa telemtetba kechi liasü? "Aji saka akhi nungi Tsüngrem kü Chuba alima nung tekümtet inyaker (t.12)."

Tsükchiri ne taküm nung teraksa inyaker asü? Iba ken tajungshiba nung azüitang: Tsüngrem chuba menden lir; Pai yarir aser na kümzük; aser tesüiba nung inyakba ama tanga inyaksü Pa tamang katetba lir. Ne taküm nung pai azüokba bilemtettang. Na yaritsü Pa dang asüngdangang, aser tesü ne tamang Pa nem agüjang.

# Bishop of Hong Kong-i Beijing semdangtsü sentong yanglur

**Hong Kong, Metsüremi/March 22 (Agencies):** Catholic Diocese of Beijing indang Bishop Joseph Li Shan-i jaokba ama Catholic Dioces of Hong Kong indang Bishop Stephen Chow Sau-yan-i April 17 nü Beijing semdangtsü. Iba anogo pungo semdangba ya Hong Kong Diocese ajanga küm 30 jungnüa nung Beijing tang mezüngbuba semdangertem alitsü.

Bishop Stephen Chow meina Auxiliary Bishop Joseph Ha Chi-shing aser vicar general Choy Wai-man aotsü.

Catholic Hong Kong Diocese Weekly Newspaper ajanga ashiba agi, taoba küm Diocese of Beijing nungi invitation ka aru, ta Catholic Diocese of Hong Kong-i ashi. Hong Kong Diocese-i ibaji agizük.

Bishop Stephen Chow Sau-yan densema putir asem den ano bishop den yariteper Wong Ka-chun aotsü. Par pezü rongnung auxiliary bishop Joseph Ha Chi-shing tangatetba

tali teladakba aser democracy asoshi nokdakba busemer ka ama züngshir. 2020 küm Hong Kong indang anti-extradition movement busemba arogo kati sarasadem sentong ka ayongzükba nung pa aden aser Hong Kong nübur dang teimla mesamatsü osang ka yoka liasü.

Pope-i agizüka aliba ama Beijing Diocese nungi Bishop Joseph Li Shan ajuruba den külemi parnoki danga bishop aser putir tem ajurutsü. Iba mapang parnoki Beijing Major Seminary aser National Seminary of the Catholic Church in China, aser ano mainland nung tamangba yimsü ketdangsuba unit balala semdangtsü. Ajisüaka alima dang tamangba yimsü dak sendakba telok balala indang tejangja sangdonga mali.

Ordination mapang Bishop Stephen Chow Sau-yan-i Hong Kong sorkar aser arogo, Catholic Church aser danga Khristanpur aser yimsü balala tsüngta apular kumner, ta shia

liasü. Bishop Chow-i Beijing semdangba mapang, pa Beijing atongba aonung danga arogo ka nikongdang sarasademba sentong ka nung adentsü.

Iba sülen Beijing nung aliba cathedral nung thanksgiving Mass ka anir agitsü.

Ming Dynasty mapang China-i arusang aser taoba küm tongti nisung ka ama sangdonga alisang Italian Jesuit priest Matteo Ricci indang leper semdangtsü.

Tang aliba Pope Francis-i Matteo Ricci ya aiben tushia aser pa nem tenüngsang agüja jembia lir. Bishop Stephen Chow Sau-yan ya Society of Jesus nungi lir, aser Father Matteo Ricci ya kasa nungi lir. Iba den külemi Beijing nung Hong Kong senso mapa inyaker indang sobaliba ajungkettsüba telok balala semdangtsü.

May 17, 2021 nung Pope Francis-i arishi küm 61 tain Stephen Chow Sau-yan ya Diocese of Hong Kong indang



Catholic Diocese of Hong Kong indang Bishop Stephen Chow Sau-yan noksa nung angur.

Bishop toku buba shima liasü. Hong Kong diocese nungi bishop kati tesüsa (1994) Beijing semdangertem küm 30 jungnüa lir ta data kar ajanga sayur. Iba mapang Hong Kong indang Bishop ya Cardinal John Baptist Wu Cheng-chung liasü aser Beijing-i March 1985 nung par ki aliba yimti semdangtsü jaok.

Pai 1994 küm Beijing semdangba mapang China nunger ketdangtsü temi tamangba yimsü ketdangsuba aser Hong Kong aser Macau affairs indang officuals in charge nunger indang asüngdanga liasü. Bishop Wu-i Beijing semdangba ya 1949 sülen Hong Kong bishop kati mainland China semdangertem mezüngbuba liasü. Iba sülen Hong Kong diocese atema shimba bishop asem - Joseph Zen, John Tong Hon, aser Michael Yeung Ming-cheung nungeri bishop ama Beijing mesemdang.

AO OSHI ANGAZÜKDAK: TANÜ ANGAZÜKTSÜBA OJANG



Petitsüng

(n) ango tila tapu ka, ngashi atema akonger (small fish family)

\* Petitsüng ngashi agi asüba lon kanga junger.

Petsa

(v) tilala küma raksatsüba (tear or pluck into pieces)

\* Tanurtemi atsüki nung narö ajak petsatsü.

OLONG PAITEP # 6464

Grid for OLONG PAITEP # 6464 with numbers 1-15 in various positions.

TIPIEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsümapangsüiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. \_\_\_\_\_ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. \_\_\_\_\_ kibur - (5)
13. Tebur tembar tsüngda jatepba - (4)

OLONG PAITEP # 6463 TELANGZÜBA

TIPIEN :

- 1. Semtu, 3. Lepko, 5. Bilem, 8. Ulu, 10. Tsüngpang, 11. Tesangwa, 13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong, 6. Lungkak, 7. Milak, 9. Zünga, 10. Temopu, 12. Walu, 14. Ali.

Alokba Office Nung Boss Bai Kanga Asanger. Boss: Office nung inyaker ajak rongnung peon Alokba... Alokba: Sir, asenok kitchen downstairs nungang aliba yagi...

Tepela Tasoba Anogo. Tanur asoba anogo nung salem osang den noksa angati adokdaksünura... 1. Tenüng, 2. Tasoba anogo, 3. Küm, 4. Class, 5. School, 6. Talidak, 7. Salem osang

2024 election jakdang Assam nung LDP-i Congress den loktep



Guwahati, March 22, 2023

(Agencies): 2024 parliamentary election jakdang Assam nung Liberal Democratic Party (LDP)-i Congress den loktepogo.

LDP ya taoba BJP IT cell founding convenor Prodyut Bora ajanga tentetba telok lir.

Bora den LDP züngsemtemi Congress state unit President Bhupen Bora aser lennirtem lia Congress nung züngsem aküm.

"LDP-i Congress den lokteptsü telemtetba agiogo. India nung tesempatep aser tiyazü agi meibanger aliba agientsü atema opposition longjema alitsüla ta ozü party züngsem teimbai bilemer. Iba jagi ni parnok külem lemtet agizük" ta Bora-i ashi.

Bora ya taoba BJP national executive member ka liasü aser pa ya BJP IT Cell indang founding convenor liasü. BJP nung centralised style ketdangsuberen anema pai 2015 küm party toktsür LDP tentet.

2024 parliamentary election magidang BJP den tokteptsü atema opposition longjemtsü nüngdaker ta ajitetba agi onok Congress den loktepogo. Linük taginüba nung ajemdaker onoki Congress den lokteper, ajisüaka tesüba nungbo onoki national party ana (BJP & Congress) anema noktaka aru" ta Bora-i metetdaksü.

"Congress-i külem tangatetba aliba teloktem den longjemer

taruba Lok Sabha election tokteptsü" ta Assam Congress President Bhupen Bora-ia ashi.

LDP-i Congress nung adenba ya nija taginüba atema masü. Nisung aikati kija taginüba atema BJP nung adener, parnok aputsü ta tsüba bilemba agi adener, ta pai ashi.

"Taruba ita ishika tsüngda party aser kija aikati Congress nung adentsü imlar. Iba yagi party dang masü saka linük akangshitsü kechiyong BJP-i tamangba yimsü nung ajemdaker linük lemsanür" ta Bhupen Bora-isa metetdaksü.

LDP-i 2016 assembly election nung toktepa liasü saka menden ka nung danga takok mengutet.

NDFB telungpur ka taküm piyong tepuokdak ayutsü

Guwahati, March 22, 2023

(Agencies): National Investigation Agency (NIA) indang special court kati March 22, 2023 nü Bodo telungpur Rabi Basumatary taküm piyong tepuokdak ayutsü obendang agütsüogo.

2014 küm Assam nung yimdaklirtem dak injang mashii khaloktsüba atema pa aitsü.

India Penal Code aser Unlawful Activities (Prevention)

Act kübok Basumatary küm 10 'rigorous imprisonment' asütsü temerenshi agütsü.

Pa ya March 13, 2023 nü okadaki aitsü aser IPC o UA (P) Act kübok arlla aika kübok pa taküm piyong tepuokdak ayutsü temerenshi agütsü.

"Bodo telungpur dang senchi chiogo aser pai mapang shitak nung sen magütsüra, ano tepuokdak mapang talila ayutsü" ta NIA court-i metetdaksü.

May 1, 2014 nü National Democratic Front Boroland (NDFB) telungpurtemi Balapra yimtsüngi ao aser yimdaklirtem dak injang khaloktsü.

Iba ya Kokrajhar district kübok lir aser G. Bidai o Songbijit na lenisüba kübok NDFB lennirtemi tetuyuba agütsüba ama iba mapa ya inyak.

Iba tatalokba dak sendakba nung special NIA court-i 2015 küm 'Special Case' ka benoka liasü.

World Water Day 2023: Manipur nung bike rally ka ayongzük

Imphal, March 22, 2023

(Agencies): "World Water Day 2023" tenüng nung Manipur Chief Minister N Biren Singh-i Water Conservation indang bike rally ka tenzüksü.

Iba anogomung ya Accelerating Change omen nung ajemdaker amonger aser Public Health Engineering Department-i Khuman Lampak, Imphal nung sentong ayongzük.

Iba rally ya Sendra nung tembang aser iba ya Loktak lake nung shilem ka lir.

Bike rally nung nisung 100-i shilem agi aser parnoki Loktak longa senzü.

"Tenemlen rally tem ayongzüka agütsüla kechiyong item tesem nung arem samatsür. Yimdaklirtemi süngdonglidong ya tongtipang ta angatetsü aser arem madak kibur asüba jangjatsü

indang osangtem prokshitsüla" ta CM N Biren Singh-i ashi.

Manipur nung Prime Minister indang Har Ghar Jal Mission mapa inyaker aser tang tashi nung pipe 75% tashi enokogo saka tzü melira amajok dang lir ta paisa ashi.

CM Biren-isa nübortem dang süngdonglidong talila atemtsü aser lenden nunga süngdongtem atemtsü ayongzük.



Assam nung aliba Kaziranga National Park nung April ita anogo atema elephant aser jeep safaris shibangtsü. April 6 aser 7 anogotem "Gaj Utsav-2023" atema elephant & jeep safaris shibangtsü ta eastern Assam wildlife divisional forest officer Ramesh Gogoi-i ashi. April 6, 2023 nungi "Gaj Utsav-2023" (Elephant Festival) tenzüksü aser iba sentong nung President Droupadi Murmu akok. Iba benjung ya Kaziranga National Park-i kümshia ayongzük aser 2017 census agidang Assam nung arem shidi 5719 aliba bushitetogo.

# Philippine nung US nem base talila pezü amshidaksütsü

**Manila, Metsüremi/ March 22 (Agencies):** Philippines nung yoka aliba United States sepitem nem linük kübok tesem balala nung amenoka aliba military bases tasen pezü amshidaksütsü, kong South China Sea nung mangatettep adoker aliba tesem tsütsü shir aliba province ka densema lir, ta Philippine tir Ferdinand Marcos Jr-i ashi.

Marcos indang administration-i taoba ita sangdong ka ajanga US nung sepaitem melentepa Philippine military camp tasen pezü nung mapang telatet ka makai lidaksütsü, ta ashi. 2014 Enhanced Defence Cooperation Agreement kübok local base pongu lemzüksür aliba den item base tasemtem ya bendenloksü.

Base tasentem nung northern Philippines kübok tesem balala densema lir aser iba jenjang agiba ajanga China mepeladaksütsü akok, kechiyong iba ajanga US sepaitem nem southern China aser Taiwan anasa tamendakdak tajung ka agütsütsü.

"Philippines kübok tesem balala nung tesem talila pezü lir.. kar north len, kar Palawan temeket nung aser kar south len lir," ta Marcos-i Bodhbarnü osangbenertem den sensaksema mapang ashi.

Marcos-isa, tesemtem yakta sangdongtsü ta ashiba den, item tesemtem ajanga linük anütoklen asetkong tulutiba Luzon kümzüka ayutsü atema tashi tali agütsütsü, ta shisem. Iba

asetkong ya Philippine nung asetkong tongtitem rongnung Taiwan anasatiba asetkong lir.

Taoba mapang Philippine military tekolak kati, Taiwan den shitepa aliba Luzon asetkong kübok Isabela, Zambales aser Cagayan province tem nung military base tem aser South China Sea nung mangatettep adoker aliba Spratly asetkong anasa Palawan tesem nung military base amshitsü asoshi US-i temelaba meshiogo, ta ashi.

Local sorkar lenirtem karibo US sepaitem nem linük nung tesem balala amshitsü temelaba agütsütsü asoshi Marcos-i telemtetba agiba anema nokdakdar, kechiyong iba ajanga US aser China na Taiwan dak sendakba nung mangatettep adokra parnoka atsür aitsü ta bilemer.

Marcos-i Bodhbarnü ashiba agi, pai local sorkar ketdangsürtem dang parnok aliba tesemtem nung US military atsülanga aotsü koda tongtibang iba indang metetdaksütsü asoshi shiogo.

Marcos-isa, ketdangsürtemi parnok aliba tesemtem nung US military amenokdaksütsü asoshi agizüktettsü imlaba lemsatepaba liasü, ta local media outlet Inquirer.net sangdong ka ajanga metetdaksü.

US-i Palawan nung Antonio Bautista Air Base, Pampanga nung Basa Air Base, Nueva Ecija nung Fort Magsaysay, Cebu nung Benito Ebuena Air Base aser Mindanao nung Lumbia Air

Base tem nung USD million 80 intoka infrastructure ajungkettsütsü tenangzükba agütsüogo.

Bodhbarnü Philippines nung sepaitem den o jembiba mapang Marcos-i parnok dang kümüma alitsü ayongzük, kechiyong bendangertemi linük amokmerenba tali tebenjaba kümogo aser kodang kechi ataloktsü mejangjai kümogo, ta ashi. Marcos-i osang tejangja magütsü, ajisüaka linük litsü amokmerenba tali kümü aoba pai jangja lir ta ashiba den iba atema linük tasa melenshitsuasa akümtsü ta shisem.

Washington-i China military dak sendakba nung azioktsü atema jenjang agiba aser Beijing aser Philippines amala kidanger linüktem tsüngda tebandang adokdaksüba atema China-i US aja arudar.

"Military tesendaktep ajanga rongsenketzung nung maongkba balala aser mapa agütsüba ya miim jema tzüra temdaksüba aser komo tajem nung nenshiba den kasa lir," ta Manila nung amenoka aliba Chinese embassy-i tawa ashi.

"Iba amala tesendaktep ajanga linük temeket nung yimjung lendongbang nung toktsütsü aser Philippines mangatettep nung densemdakja tatem nungbo rongsenketzung terenlok raksatsütsü," ta embassy-i ashi.

US aser Philippine sepaitem taruba ita linük ana tsüngda combat exercise sentong tulutiba ayongzüka agitsü renema lir.

## KÜM 100 ABENSAR



MANGDAKYANGBA (MANGMETONG)

"Aser oda asa tao tonga ni ano kasa lir, nenok kopu mapu tashi ni nenok abentsü, Ni yangluogo aser Ni apungtsü. Ni abentsü aser ni kümzüksütsü".

ISAIAH 46:4

~Tsüngrem tenüng sanga, Chimur, Semchirtem aser Anükapang.

## METONGSHITSÜR

Tir Yimyim adok 159, March 22, 2023 nü Page 7 nung Merangkong Senso Mungdang ajanga "Tenüngsang agütsür" ta adokba nung "TAKOMAYANG" Secretary, Merangkong Senso Mungdang ta alibaji "TAKOMANGYANG" Secretary Merangkong Senso Mungdang ta tazünger metongshia azüngtsü mepishir. Aibelenba atema sasar.

# Afghanistan aser Pakistan nung menoknok anak, nisung 13 asü

**Islamabad, Metsüremi/ March 22 (Agencies):** Afghanistan aser Pakistan nung menoknok magnitude 6.5 agi kongshiba sülen nisung 13 asü aser noklang dak tema yiru, aser iba menoknok ya India yimtiba, New Delhi nungia metet.

Pakistan northwest tsütsü nisung toku asü aser 44 yiru, ta sorkar ketdangsür kati Bodhbarnü ashi. Northern Khyber Pakhtunkhwa province nung mozüki tem ammag tepiyong state of emergency nung yua liasü.

Afghanistan nunga nisung pezü asü aser 50 shi yiru, ta health ministry ketdangsür kati osangbener dang ashi.

Iba menoknok ya Pakistan aser Tajikistan den arütsü anasa Afghanistan kübok Jurm jila nungi southeast tsütsü mile 25 shi pilar anak, ta United States Geological Survey (USGS) ajanga Mongulbarnü ashi.

Iba menoknok ya tesem kilometre 1,000 dak tema nung Pakistan, India, Uzbekistan, Tajikistan, Kazakhstan, Kyrgyzstan, Afghanistan aser Turkmenistan nung nisung million 285-i metet, ta European-Mediterranean Seismological Centre-i ashi.

Pakistan indang Meteorological Department-ibo menoknok ya magnitude 6.8 anak ta ashi aser ano mapang tatsüka lir Afghanistan den arütsüa aliba Hindu Kush

region nung magnitude 3.7 anoka liasü.

Linük northwest tsütsü Pakistan's Rescue 1122 service indang odongtar Bilal Faizi aser ano ketdangsür temi ashiba agi, northwestern Pakistan nung tesem balala nung kilem chirepa nisung toku asü.

"Ki indang jara laoka Swat nung arishi küm ter tain tetsür ka aser Lower Dir nung arishi küm 24 tain tebur ka asü," ta Faizi-i ashi.

Linük yimtiba, Islamabad nungi mile 112 shi pilar Swat district nung menoknok alua liasü, ta pai ashi.

"Iba menoknok nung ki 20 dak tema raksatsü aser nisung aika yiruogo," ta pai ashi.

Khyber Pakhtunkhwa province kübok Swat Valley nung aliba mozüki tem nung nisung 250 shi anepalua liasü aser item rongnung nisung 15 shi tera yiru aser 200 dak tema nisung memeteti liasü. Ano iba province kübok danga tesemtem nung nisung 52 yirua liasü, ta ketdangsüri ashir.

Pakistan Ato Kilonser Shehbaz Sharif-i linük indang disaster management ketdangsür dang saksalema alitsü shiogo.

Taoba küm Afghanistan anüdoklen menoknok magnitude 6.1 anoka nisung 1,000 dak tema asü. 2005 küm northern Pakistan nung menoknok magnitude 7.6 agi kongshia nisung 73,000 shi asü.

**GOVERNMENT OF NAGALAND  
OFFICE OF THE GENERAL MANAGER, DISTRICT INDUSTRIES CENTRE  
CHOZUBA, PHEK: NAGALAND.  
Email: dicchozuba19@gmail.com**

NO.DIC/CZBA/TRG (RAP) 18/2006

Dated Chozuba, the \_\_\_ March 2023.

### ADVERTISEMENT

Application are hereby invited from bonafide local candidates for undergoing 9 (nine) months cutting and tailoring training under Rural Artisan programme (RAP) at District industries Centre Chozuba, Phek. The Training will commence from 10th April to December 2023.

Number of trainees will be 10(ten) and Education Qualification for the candidate will be class-VIII (Eight) passed and above. The candidate will have to appear an interview on 5th April 2023 at DIC chozuba in the office chamber of the undersigned in their own expense and no separate calling letter will be served in this connection. The candidate should bring their original certificates during the interview without fail.

The application along with the photo copies of the documents should reach the office on or before 3rd April 2023. Documents Required:-

1. Indigenous certificate
2. Schedule Tribe certificate.
3. Certificate for proof of Education Qualification.

The selected candidates will be provided with a stipend of Rs 500/- per month during the training. The training is being imparted for self employment avenues.

**(CHOLZO SOPHIE)**  
General Manager  
District Industries Centre,  
Chozuba, Phek, Nagaland.

## WWB Championships: Nitu Ghanghas semifinal-i iogo



2023 IBA women's Boxing World Championship nung India tsür Nitu aser Japan tsür Madoka Wada na 45-48kg category quarterfinal asayaba mapang tangokba noksa nung angur.

**New Delhi/Metsüremi/March 22 (Agencies):** Tang asaya aliba Women's World Championships nung Bodhbarnü semifinal-i aiba sülen Commonwealth Games champion boxer Nitu Ghanghas-i (48kg) India team atema mezüngbuba medal angutsü jangja kümogo.

Haryana nungi arishi küm 22 tain boxer yagi quarterfinal nung Japan tsür Madoka Wada koka liasü. Iba asaya ya lai tanabuba round nung RSC (referee stops contest) agi koka la aser India atema

bronze medal bosa angutsü jangja kümogo.

India nunger asayar yagi tetenzük nungi kanga aggressive süa asaya aser Japa tsür la dak aiben tsüngokja liasü aser ibayongji referee-i asaya anendaktsü aser Nitu nem takok agüja liasü.

Nitu-i taoba asaya-a RSC agi koka liasü aser iba asayamung nung la gold medal angutsü nükjidong yur asayaba ya Japan tsür la den asayaba mapanga reprangetogoo.

Round of 16 bout nung Nitu-i Tajikistan tsür Sumaiya

Qosimova mezüngbuba round nung RSC agi akok aser iba sülen la asayaba yimya dak kanga temulung lemteta quarterfinal-i ai.

World championship tesüsüsabuba koker alila Nikhat Zareen (50kg), Sakshi Choudhary (52kg), Manisha Maoun (57kg), Jaismine Lamboria (60kg), Lovlina Borgohain (75kg), Saweety Boora (81kg) aser Nupur Sheoran (+81kg) nuner ajak ano metsüki lir aser parnok ajak semifinal tonga asayatsü atema nükjidong yur asayadar.

## ISSF World Cup: Sarabjot-i Gold aser Varun-i Bronze medal angu

**Metsüremi/March 22, 2023 (Agencies):** ISSF Pistol/Rifle World Cup mezüngbuba anogo Bodhbarnü India nunger shooter Sarabjot Singh-i tebur air pistol tetoktepbu nung gold medal nguogo.

Bodhbarnüsa India nunger lanur asayar Varun Tomar-i kasa asaya nung bronze medal ka ngua liasü.

2021 küm team aser mixed team categories nung junior world champion Sarabjot-i gold medal atema asaya nung Azerbaijan nunger asayar Ruslan Lunev 16-0 agi koka liasü.

Arishi küm 21 tain Sarabjot, shibai round ajak nung kanga junga asaya liasü pai qualification round nung point 585 nguteta pa ajak dang

temaba jenjang nung liasü. Sarabjot-i qualification series trok nung 98, 97, 99, 97, 97, 97 score süa pa akoktsü atema tasak asütsü ta jangja jangja metetdaksü.

Pa sülen tanabuba jenjang nung China nunger asayar Liu Jinyao (584) liasü.

Jason Solari (Switzerland, 583 points), Vladimir Svechinko (Uzbekistan, 582), Frederik Larsen (Denmark, 580), Zhang Jie (China, 580), Ruslan Lunev (Azerbaijan, 579) aser Varun Tomar (India, 579) nungera ranking round atema qualify asüba shooter ti rongnung densema liasü.

Ranking, mesüra elimination round nung Sarabjot-i maneni kanga junga asaya aser kasa

mapang nung arishi küm 19 tain Varun shiba iba round atema qualify asürtem rongnung tatemangbuba liasü, paia kanga junga asaya tenzük.

Ranking round tembangba sülen Sarabjot (253.2 points) aser Ruslan (251.9) na mezüngbuba aser tanabuba jenjang nung liasü aser tenaprongla gold-medal round-i kanga temulung lemteta ai. Maneni Varun-i point 250.3 nguteta bronze medal angu.

Gold medal atema asayaba mapang Sarabjot ya Azerbaijan nunger shooter atema kanga jungrara liasü.

Gold-medal atema asaya ya race to 16 points asaya ka liasü aser Sarabjot-i 16-0 agi asaya ayong ayonga akok.

## BWF Rankings: Lakshya Sen jenjang trok asepzüka luogo

**Metsüremi/March 22, 2023 (Agencies):** Mongolbarnü sayaba tebur kija asaya BWF ranking nung Commonwealth Games champion Lakshya Sen jenjang trok asepzüka lua top 20 nungi tuguogo.

All England Championship nung tanabuba round nung tsükba sülen Sen jenjang 25bubai asepzüka alu.

Arishi küm 21 tain shiba taoba küm November ita jenjang 6buba tashi tua liasü, pa tawa junga masayateti arudar

aser pa Malaysia Open, India Open aser German Open nunga kanga kara tsükatok.

Taoba küm tetenzüklen Sen-i European circuit nung kanga junga asaya aser iba den India Open akok aser Germany aser All England Open final tonga asaya liasü.

Kasa mapang nung tebur kija asaya nung HS Prannoy maneni tekububa nung lir aser Kidambi Srikanth jenjang ana tejakdangi tua top 20-i maneni iogo.

Tetsür kija asaya nung PV

Sindhu maneni tukububa nung lir aser Saina Nehwal shiba All England Championships nung masaya la jenjang pongu asepzüka lua tang 32buba nung lir.

Tebur tarep asayar Satwiksairaj Rankireddy aser Chirag Shetty nata maneni trokbuba nung lir aser tetsür tarep asayar Treasa Jolly aser Gayatri Gopichand na 18buba nung lir. Taoba hopta tena All England Championship nung semifinal tonga asaya liasü.

## 6buba Open Air Rifle Shooting Tournament ayonger

**Kohima, Metsüremi/March 22 (TYO):** Kohima District Rifle Association-i ayongzüka April 15 nü D.Khel, Kohima village nung 6buba Open Air Rifle Shooting Tournament 2023 asayatsü renema lir.

Iba asayamung nung tetsür aser tebur napronglai shilem agitettsü.

Asayamung ya 10m Air Rifle brake barrel, 10m Air Rifle PCP adser 25m Air Rifle with scope bench rest ta category asem küma lemsar asayatsü.

Category ajak atema asaya nung shilem agitsü taa sen 500 asütsü.

Asaya akokertem nem senpet den ano tanga sempet balala agütsütsü ta asayamung

ayongertemi metetdaksü.

Kasa mapang nung asayamung nung shilem agitsü jangrartem atema entry form Sports World, Kohima town, Opp Bank of Baroda, Pfonuo Pan Shop, DBS Junction Kohima village aser Kitsu Pan Shop, D.Khel, Kohima village nung angutsü.

Category 1 aser 2 atema form benoktsü asoshi tatemangbuba anogoji April 13 asütsü aser category 3 atema asayaba tesem nung tenung züngoksemettsü.

Maneni asayamung dak sendakba nung osang tejangjaba agitsü atema item number: 9856569364, 9856470954 ajanga tongteprateptsü metetdaksüogoo.

## Texas Super Kings coach asütsü Fleming shimogo



**Dallas, Metsüremi/March 22 (Agencies):** Taoba mapang New Zealand captain Stephen Fleming, Dallas nung amendaker aliba Major League Cricket (MLC) club Texas Super Kings (TSK) coach asütsü shimogo. TSK puri IPL club Chennai Super Kings (CSK) den partnership ka yangluba sangdongogo.

CSK puri tawa US nung T20 asayamung tasenba dak sendakba nung osang tulu ka lemsateptsü lir ta sangdonga liasü.

TSK-i ashiba agi, CSK den longjemba ajanga inyakyim nung parnok tajangshibatem bener arua team ajangzüksü aser iba den Texas pur field nung tangar den tokteptsü atema teyari agütsütsü.

"Texas Super kings team coach Stephen Fleming lenisüba nung asayatsü. Fleming ya taoba mapang New Zealand national cricket team captain aser Indian Premier League team Chennai Super Kings indang head coach liasü. Pa 2005

küm captain ama New Zealand team nungi mezüngbuba Twenty20 international asaya liasü," ta TSK-i ashi.

Fleming lenisüba nung CSK pur IPL pezüben tashi kokogoo.

MLC nung team trok lir aser CSK den Delhi Capitals aser Mumbai Indians nata iba asayamung nung sendaka lir. Iba asayamung ya July 13 nü tenzüktsü.

MLC team trok ya San Francisco Unicorns, Lost Angeles, MI New York, Seattle Orcas, Texas Super Kings aser Washington DC lir.

Delhi Capitals pur Seattle Orcas den longjemmer lir aser Mumbai Indians pur New York franchise den sendaktepa lir.

Kasa mapang nung MLC team trokpronglai cricketer 100 dak tema nungi domestic asayar tekuku shimogo.

Team ajak nung tanungba asayartem ya linük balala nungi T20 asayar tajungtibatemi süngdaksütsü.

## BILEMDANGANG

"Yimayimpong peisasa dang azüoktettsü."